

續軒渠集 上冊

續

軒

涇

東

續軒渠集自序

續軒渠之作始于天厯戊辰時予館游洋壽峰方氏方氏子淑年未志學予以講習餘力覃思于詩歲頃得律詩及絕詩古詩長短句五百首方氏子集以示予予因閱舊稿時有佳處亦不可盡謂村舍學堂中語也因念先君子晚歲試校游洋琴書曰永燈火夜闌翁季談及此事翁有軒渠卷帙行于世視予斯作往往竊肖之然未免有具體而微之嫌兒子琦執筆侍而言曰請名以軒渠續集可乎予曰汝大父之學吾弗敢言今汝之請

似也然續之義談何易易昔太史公執其子之手泣而
言曰予先周室太史也至於予而中衰廢聖德而不載
滅賢士而不述汝復爲太史則續吾祖矣厥後史遷卒
繼其志成其業以永其傳必如是然後可以言續談何
易易吁今予茲編使具眼者見將有貂不足之誚又安
敢學漢王延壽賦靈光耶筆以授之且以志吾過云戊
辰長至日去華山人洪希文敬書

續軒渠集序

至正十二年江南州郡大治城池莆城周迴三十里築城漁民財大半入吏帑則起墳石而築之故家子孫歔歔鬱鬱莫敢籲怨洪先生獨慨念祖宗之阨抗詞哭于公庭郡府感其誠爲榜吏而增修其墓先生憂喜之情見于辭詠一日舉以示余因見其全稿續軒渠集軒渠集者其先君子吾圃翁所作也贅翁序之稱爲吾圃有子軒渠蓋笑悅之義也今予于續集輒以意起軒者軒昂渠者渠渠高大之意古之世德積小以高大先生毅

然之舉青氎加色洪氏之德自此而增高廓大矣詩賦
云乎哉抑觀此集其詣理得意處皆自肺腑流出至于
造語鍊字之法頗費工夫然卑晚唐矣使贅翁見之當
又軒渠淺學其敢評之乎至治辛酉陽月郡人林以順

敬書

至治辛酉
第三科

續軒渠集序

友人洪汝質續其先太師吾圃先生軒渠集有詩數百篇雜文又若干篇披閱再三不忍釋其佳處蓋得之東坡山谷于湖石屏數君子天然姿態端靜嫺雅非捧心效顰者所能企及今日續者不忘繼述耳詠歎之餘因成四韻吾圃箕裘有子賢極玄玄後又玄玄詩聲解使家聲振教法會將句法傳雪月淡交餘白髮溪山舊物當青氈從君問得軒渠意此樂應攜李杜先至正壬辰菊節玉井林以抃敬書

讀續軒渠集詩

先生集號續軒渠此續難同鶴與鳬雲去月來未嘗往
山鳴谷應亦何殊恍如坡老得蘇過無負韓公訓阿符
吾圃先生玉樓召天教玄圃產明珠

至正癸巳秋日郡人南譽

續軒渠集序

莆士工賦聲蓋六合嚮之冠南宮魁上庠實多莆士吾
圃洪先生工于賦者也有賦家建章行于世晚工詩詩
名軒渠集蓋取漢蒯子訓笑悅之義獨不知翁之所悅
者何事試校游洋翁季枕邊談詩則以僧敲未敢一言
定鳥過曾安幾字來之句授之夜臥三鼓聞書聲則曰
有子定知吾事足貧家頗覺此聲佳誌喜詩云風露對
檠逼諸父雲煙落紙凜羣兒甫譏失學難爲比珍見趨
庭喜可知則知翁之所悅有在矣詩謝四如翁序軒渠

云阿戎也自蒙稱賞破甕終宵起舞頻又知翁之所悅
有足徵矣鳴鶴在陰其子和之異日有續軒渠之作是
父是子故能成一家機軸句法典重詞翰俱稱竊肖其
父詩所謂以似以續是也昔宋太祖問顏延年卿諸子
誰有父風對曰竣得臣筆測得臣文今汝質其兼得之
矣安得不爲具眼賞識系以詩曰紹江西派舍君誰人
道義之有五之鐵畫銀鉤勢雄偉錦心檀口意新奇當
時已有容齋筆後集能無老圃詩料得推敲傳活法過
庭盡付寧馨兒

此序無年月其姓氏亦脫據顧嗣立
元詩選小傳當是易隱卓器之撰

續軒渠集序

筆峰子曰余讀三百篇而知詩之爲教也蓋道人情明
物理紀世政樹家聲昭訓則廣彝倫達幽明而章天道
諸教備矣是故聖人述之而範世趨焉漢魏以來作者
彌眾其篇什之富藻律之雄思致之精聲文之備蓋駸
駸乎風雅矣閒有娛花鳥之神適風雲之性不登于訓
而麗乎詞則後世亦無述焉吾鄉先正教諭洪吾圃先
生當胡元之運不樂仕進肥遯畜識以詩律自鳴所著
有軒渠集若干首其仲子訓導希文號去華山人妙承

宗旨嘗與夜半談詩渠然樂適故其詩曰有子定知吾
事足貧家頗覺此聲佳又曰風露對檠通諸父雲煙落
紙凜羣兒集之名軒渠以此惜乎今散落不見其全其
所存者惟去華山人續軒渠集而已續詩二卷爲律詩
一百九十二首古詩九十七首絕句一百首其閒固多
警句有季唐之風而其出入子史搜剔經墳又自蘇黃
而下別一機軸齊諧方韻閒以成言則又能以質勝不
蔽其情蓋山水之疊疊也其族孫紹興郡守玉方氏將
刻以傳吾觀洪有世德而其詩書之澤雖里處林居之

士代有聞人至紹興君又光大之夫軒渠之教子學詩
之訓也去華之續集無忝之義也二先生之垂後有穀
之詒也紹興之續緒似續之大也皆于世教有裨也而
非必以其詩也是可以序而傳也嘉靖壬辰春三月初
吉賜進士出身中憲大夫直隸淮安府知府同邑後學
耕原王鳳靈拜手謹序

續軒渠集序

續軒渠集者洪西淙公祖遺之詩稿也一日出其稿以示宗亮且曰是祖父子俱以詩鳴父詩曰軒渠集子詩曰續軒渠集父集蠹爛不存子集楮墨僅具子孫微意謂梓傳庶幾可久惟君子公心酌之予未視其集無以應也既繙閱數日乃復于西淙曰是儒傳學而志於道者其發之聲詩所謂以山澤之癯而出山澤之語也譬諸夏彝商鬲華采雖若不足而渾厚樸素之質使望之者知爲古器而自泯其瑍巧之心也盍梓之以訓厥宅

里西淙曰惜父集之無傳也予曰父子一志祖孫一德
子有文則可以知其父孫有謨則可以識其祖嘗聞軒
者開也渠者大也胸次悅豫之義東漢薊子訓之方言
也故父子相賢一家之軒渠矣祖孫相賢奕世之軒渠
矣謂軒渠之義見于詩章則可謂詩集盡夫軒渠之義
則不可也天地聖賢之心不能盡載方策而父子軒渠
之志公何獨得於意外乎西淙莞爾而不言續集詩五
百餘首今抹去一百三十五首梓行四百三十五首類
分爲十卷外附刻一卷作軒渠集者名巖虎字德章號

吾圃續軒渠集者名希文字汝質號去華山人係宋末
元初莆田人西淙名珠字玉方山人之七世族孫也今
爲紹興郡牧嘉靖十一年歲在壬辰秋七月吉賜進士
第奉政大夫四川等處提刑按察司僉事奉勅提督學
校白鹿山人山陰蔡宗堯書

續軒渠集序

洪氏名希文元儒者也其學博而邃其氣浩而昌其爲文搜奇抉怪軋世傾類灑灑游泳直遂放達若魚龍之遊于川鸞鳥之翔于雲任性適意殊弗經念而縱肆焉卽其抵極磅礴萬象馳驟羣方咸出情性美哉盛矣邈然寡儔特其音韻振擊調度凌奪協之古金石之聲若不足焉則公大有所來矣公之生當元叔世天下板蕩夫情弗眞則辭弗則辭弗則則意弗揚意弗揚則傳弗信傳弗信則垂弗永何賴于有詩哉卽詩而觀之一倡